

U skladu sa članovima 24. i 48., članom 10. te cjelokupnim poglavljem V kao i drugim relevantnim odredbama Statuta Asocijacije kompozitora – muzičkih stvaralaca (u nastavku „Udruženje“) i drugim relevantnim pozitivnim pravnim pravilima prije svega Zakona o autorskom i srodnim pravima (Sl. glasnik BiH br. 63/10) (u nastavku: „ZAISP“) i Zakona o kolektivnom ostvarivanju autorskog i srodnih prava (Sl. glasnik BiH br. 63/10) (u nastavku: „ZKOAISP“), uvažavajući i uzimajući u obzir međunarodna i općeprihvaćena pravila, standarde i principe kolektivnog ostvarivanja autorskih prava vezane za pristup članstvu u kolektivnim organizacijama, sve vrijeme uzimajući u obzir činjenicu da je posebno bitno da proces pristupanja redovnih članova Udruženja bude uređen, transparentan i efikasan ali i da onemogući koliko je razumno moguće da osobe koje nisu kvalifikovane za redovno članstvo pristupe redovnom članstvu Udruženja, uvažavajući zakonsku, moralnu i drugu obavezu Udruženja da dokumentuje činjenice na osnovu kojih je osoba pristupila redovnom članstvu Udruženja, Skupština Udruženja, na sjednici održanoj 18.06.2020. godine usvaja sljedeći:

P R A V I L N I K

o postupku pristupanja u redovno članstvo Asocijacije kompozitora – muzičkih stvaralaca

Član 1.

- (1) Ovim pravilnikom se uređuje postupak pristupanja kvalifikovanih osoba koje nisu redovni članovi Udruženja u redovne članove Udruženja.
- (2) Ovim pravilnikom se ne uspostavljaju novi uslovi za redovno članstvo u Udruženju, mimo uslova propisanih relevantnim pozitivnim pravnim pravilima, prvenstveno ZAISP-a i ZKOAISP-a i Statutom Udruženja, već samo uređuju procesne i provedbene odredbe kojima se konkretiziraju relevantne zakonske odredbe i odredbe Statuta Udruženja povodom provjeravanja zadovoljenja uslova za pristupanje u redovno članstvo i povodom pristupanja osoba u redovno članstvo Udruženja. U slučaju bilo kakvog sukoba bilo koje odredbe ovog pravilnika sa bilo kojom zakonskom odredbom ili odredbom Statuta Udruženja prednost uvijek ima odredba zakona odnosno Statuta Udruženja.
- (3) Ovim pravilnikom se ne uređuje postupak izbora/pristupa počasnih članova Udruženja.
- (4) Ovim pravilnikom se ne uređuju prava ili obaveze redovnih članova Udruženja, osim prava i obaveza redovnih članova udruženja i drugih osoba vezanih za pristup redovnom članstvu Udruženja i koja proizilaze iz prava i obaveza svih ovih osoba iz postupka pristupa redovnim članovima Udruženja.
- (5) Korištenje imenice/zamjenice ili druge vrste riječi koja označava jedan pol neophodno podrazumjeva i bezizostavno uključuje sve polove i jednako se primjenjuje na sve jedinke bez diskriminacije na osnovu pola, rase, vjere, etniciteta, političke pripadnosti ili bilo koje druge osnove.

Član 2.

Sukladno relevantnim pozitivnim pravnim pravilima i Statutu Udruženja, redovnom članstvu Udruženja može pristupiti:

- a) fizička osoba koja je ili autor i/ili koautor povodom barem jednog autorskog muzičkog djela ili nosilac autorskog prava povodom barem jednog autorskog muzičkog djela a koje je državljanin Bosne i Hercegovine;
- b) fizička osoba koje je ili autor i/ili koautor povodom barem jednog autorskog muzičkog djela ili nosilac autorskog prava povodom barem jednog autorskog muzičkog djela a koja nije državljanin Bosne i Hercegovine ali kojoj osobi je nadležni državni organ BiH na pravno valjan način odobrio stalni boravak u Bosni i Hercegovini, i
- c) pravna osoba koja je nosilac barem jednog individualnog subjektivnog prenosivog autorskog prava povodom barem jednog autorskog muzičkog djela a koja pravna osoba je registrovana u Bosni i Hercegovini.

Član 3.

- (1) Sukladno odredbi člana 15. i člana 16. Zakona o kolektivnom ostvarivanju autorskog i srodnih prava (Sl. glasnik BiH br. 63/10) i članu 11. Statuta Udruženja, Udruženje ne može odbiti zahtjev za pristup redovnom članstvu Udruženja osobe koja zadovoljava uslove za redovno članstvo iz ZKOAISP-a, Zakona o autorskom i srodnim pravima (Sl. glasnik BiH br. 63/10) te Statuta Udruženja odnosno osobi koja je kvalifikovana sukladno

odredbi člana 2. ovog pravilnika, osim u slučajevima izričito predviđenim ZKOAISP-om, ZAISP-om, Statutom Udruženja ili drugim primjenjivim pravnom pravilom.

(2) Udruženje nema obavezu da dozvoli pristupanje u redovno članstvo Udruženja osobama koje ne zadovoljavaju statutarne i zakonske uslove odnosno osobama koje nisu kvalifikovane sukladno članu 2. ovog pravilnika pa može usloviti pristupanje redovnom članstvu Udruženja kada to proizilazi iz odredbi ZKOAISP-a, ZAISP-a, Statuta Udruženja i drugih relevantnih pravnih pravila.

(3) Da bi se osigurao integritet redovnog članstva Udruženja i postupka pristupa redovnom članstvu Udruženja, za potrebe ovog Pravilnika, ima se smatrati i uzeti da nijedna osoba ne zadovoljava zakonske i statutarne uslove za pristup redovnom članstvu Udruženja odnosno da nijedna osoba nije kvalifikovana sukladno članu 2. ovog pravilnika dok ne pruži konkretan dokaz kojim ustanovljava i dokazuje svoje zadovoljenje zakonskih i statutarne uslova i kvalifikovanost za pristupanje redovnom članstvu Udruženja.

(4) Udruženje ima pravo i obavezu da uslovi pristupanje u redovno članstvo Udruženja dostavljanjem prihvatljivih pravno valjanih i povjerljivih dokaza da osoba koja želi pristupiti redovnom članstvu Udruženja zadovoljava sve zakonske i statutarne uslove odnosno da je kvalifikovana sukladno članu 2. ovog pravilnika za pristupanje redovnom članstvu Udruženja.

(5) Udruženje ima pravo i obavezu da utvrdi i dokumentuje za svakog člana svaku od pravno relevantnih činjenica koje predstavljaju uslov za pristupanje redovnom članstvu Udruženja sukladno relevantnim zakonskim i statutarne odredbama, odnosno kvalifikovanost prema odredbi člana 2. ovog pravilnika pristupanju redovnom članstvu Udruženja.

(6) Pravo i dužnost je osobe koja želi da pristupi u redovno članstvo Udruženja da dostavi sve potrebne i pravno valjane dokaze kojim utvrđuje svoje zadovoljavanje zakonskih i statutarne uslova za redovno članstvo u Udruženju odnosno kvalifikovanost sukladno članu 2. ovog pravilnika.

(7) Udruženje ima pravo i obavezu da onemogući pristup redovnom članstvu Udruženja svakoj osobi koja ne ispunjava u potpunosti svaki od relevantnih zakonskih i statutarne uslova odnosno je u potpunosti kvalifikovano sukladno odredbi člana 2. ovog pravilnika za pristupanje redovnom članstvu Udruženja.

Član 4.

(1) Osoba pristupa i postaje redovnim članom Udruženja kada ovlaštenu predstavnik Udruženja i ta osoba oboje i obostrano potpišu ugovor o kolektivnom ostvarivanju autorskih prava autora muzičkih djela te kada stupa na pravnu snagu taj ugovor između te osobe i Udruženja. Tek od tog trenutka nastupaju prava i obaveze koja proizilaze iz redovnog članstva u Udruženju za tu konkretnu osobu.

(2) Osoba koja je pokrenula postupak pristupa članstvu Udruženja nema prava iz redovnog članstva u Udruženju osim prava koja za istu proizilaze iz relevantnih zakonskih odredbi, eventualno Statuta Udruženja i iz ovog pravilnika sve do trenutka dok ne pristupi redovnom članstvu Udruženja na način i u vrijeme uređeno relevantnim propisima i ovim pravilnikom.

(3) Udruženje neće zaključiti ugovor o kolektivnom ostvarivanju autorskih prava autora muzičkih djela sa osobom koja nije dokazala dostavljajući prihvatljive dokaze Udruženju u skladu sa ovim pravilnikom da zadovoljava zakonske i statutarne uslove za redovno članstvo, odnosno koja nije dokazala da je kvalifikovana sukladno članu 2. ovog pravilnika za pristup u redovno članstvo.

(4) Nakon stupanja na snagu ovog pravilnika, ugovor o kolektivnom ostvarivanju autorskih prava autora muzičkih djela koji se na bilo koji način zaključi sa osobom koja nije dokazala dostavljajući prihvatljive pravno valjane i provjerljive dokaze Udruženju u skladu sa ovim pravilnikom da zadovoljava zakonske i statutarne uslove za redovno članstvo u Udruženju, odnosno koja nije dokazala da je kvalifikovana članom 2. ovog pravilnika za pristupanje redovnom članstvu u Udruženju neće proizvoditi pravno dejstvo koje bi proizvodio da jesu dokazane potrebne činjenice, u onom obimu i sa onim pravnim posljedicama koje su pod pravnom kontrolom Udruženja.

(5) Predstavlja povredu članske discipline člana Udruženja kao i relevantnih obaveza člana organa Udruženja ukoliko član koji djeluje u organima Udruženja potpiše ugovor o kolektivnom ostvarivanju autorskih prava autora muzičkih djela sa osobom koja nije dokazala dostavljajući prihvatljive dokaze u skladu sa ovim pravilnikom Udruženju da zadovoljava zakonske i statutarne uslove za članstvo, odnosno koja nije dokazala da je kvalifikovana članom 2. ovog pravilnika za pristupanje redovnom članstvu Udruženja. Takva osoba će snositi punu disciplinsku, ali i imovinsku, moralnu i svaku drugu odgovornost za svoje djelovanje Udruženju i svakom individualnom članu Udruženja.

(6) Predstavlja povredu iz radnog odnosa i narušavanje radne discipline ukoliko službenik Stručne službe Udruženja ili drugi zaposlenik Udruženja odnosno bilo koja osoba koje je na bilo koji način pravno povezana

sa Udruženjem dostavi na potpisivanje ili na bilo koji način djeluje da se dovede do potpisivanja ugovora o kolektivnom ostvarivanju autorskih prava autora muzičkih djela sa osobom koja nije dokazala dostavljajući prihvatljive dokaze u skladu sa ovim pravilnikom Udruženju da zadovoljava zakonske i statutarne uslove za redovno članstvo, odnosno koja nije dokazala da je kvalifikovana članom 2. ovog pravilnika za pristupanje redovnom članstvu Udruženja. Djelatnik Stručne službe, zaposlenik Udruženja odnosno obaveza koja je djelovala na način iz ovog stava ovog člana će snositi punu disciplinsku, ali i imovinsku, moralnu i svaku drugu odgovornost za svoje djelovanje Udruženju i svakom individualnom članu Udruženja.

Član 5.

- (1) Generalni direktor Stručne službe Udruženja će imenovati i ovlastiti jednog ili više djelatnika Stručne službe, zaposlenika Udruženja ili osoba koje imaju pravnu obavezu da djeluju u ime i za račun Udruženja za upravljanje, administriranje, izvođenje i vođenje postupka pristupa redovnom članstvu Udruženja.
- (2) Udruženje ima obavezu da na primjeren i razuman način čuva podatke vezane za i dokaze dostavljene u postupku pristupa redovnom članstvu Udruženja sukladno pravilima i dobrim običajima uredskog poslovanja, arhiviranja i čuvanja dokumenata i općenito standardima osiguravanja zaštite ličnih i privatnih podataka, evidencijarnim pravilima i pravilima povodom transparentnosti djelovanja Udruženja.
- (3) Za arhiviranje i čuvanje dokumenata, dokaza, podataka i drugih elemenata vezanih za postupak pristupa redovnim članovima Udruženja se zadužuje Direktor Odjela za distribuciju i obradu podataka Stručne službe Udruženja.
- (4) Direktor Odjela za distribuciju i obradu podatka Stručne službe Udruženja će odlukom pobliže urediti pojedinosti vezane za arhiviranje i čuvanje podataka o prijavi autorskih muzičkih djela Udruženju.
- (5) Udruženje će učiniti dostupnim putem internet stranice Udruženja i u uredima Udruženja sve potrebne obrazce povodno postupak pristupa redovnom članstvu Udruženja, ovaj pravilnik, primjerena obrazloženja, vodiče, pojašnjenja i druge savjete povodom postupka pristupa redovnom članstvu Udruženja.
- (6) Direktor Odjela za distribuciju i obradu podataka Stručne službe Udruženja se posebno zadužuje da vodi pažnju na ekonomičnost, učinkovitost, brzinu i olakšanje postupka pristupa redovnih članova. Postupak pristupa redovnih članova Udruženju treba da zahtjeva što manje utroška vremena, novca i truda osobe koja želi da pristupi redovnom članstvu te osoba iz ovog stava treba da obrati pažnju da, zadržavajući legitimitet, transparentnost, dokazivost i uređenost postupka pristupa redovnom članstvu Udruženja Stručna služba Udruženja se što bliže približi idealima iz ovog stava.
- (7) Direktor Odjela za distribuciju i obradu podataka Stručne službe Udruženja će kada primijeti probleme u primjeni ovog pravilnika i/ili postupka pristupa redovnih članova Udruženju da podnese izvještaj i predloži mjere za uklanjanje uočenih nedostataka Upravnom odboru, koji može odlukom da uputi na odluku Skupštini Udruženja izmjene i dopune ovog pravilnika.
- (8) U svakom slučaju godinu dana nakon stupanja na snagu i primjene ovog Pravilnika Direktor Odjela za distribuciju i obradu podataka Stručne službe Udruženja će analizirati njegovu primjenu i podnijeti izvještaj Upravnom odboru Udruženja kao i predložiti konkretne mjere za poboljšanje postupka pristupa redovnom članstvu Udruženja i uklanjanje uočenih nedostataka.

Član 6.

- (1) Kako sukladno odredbi člana 18 Udruženje ima obavezu da autore koji nisu Udruženje obavijestili da će svoja prava ostvarivati na individualan način tretirati ravnopravno s autorima koji su s Udruženjem sklopili ugovor o kolektivnom ostvarivanju, kako je članstvo u Udruženju u potpunosti dobrovoljno, slobodno a kako Udruženje ima obavezu da utvrdi, dokumentuje i ima dokaz za izvjesne pravno relevantne činjenice za koje primjenjive relevantne pravne norme vežu prava i dužnosti kako redovnog člana tako i Udruženja te kako Udruženje mora imati pristup izvjesnim ličnim podacima da bi primjereno djelovala u zaštiti i kolektivnom ostvarivanju autorskih prava povodom autorskih muzičkih djela tih članova, kao što je vršenje isplate i komuniciranje sa članom, osoba koja želi pristupiti u redovno članstvo Udruženja ima pravo i obavezu da dostavi sve potrebne činjenice, podatke i dokaze, uključujući i takve činjenice, podatke i dokaze koji se mogu smatrati i koji se klasifikuju od strane relevantnim pozitivnih pravnih pravila ličnim, a koji su potrebni Udruženju sukladno relevantnim pozitivnim pravnim pravilima, Statutom i ovim Pravilnikom radi prikupljanja osnovnih činjenica o tim osobama i radi dokazivanja zadovoljenja zakonskih i statutarne uslova za redovno članstvo u Udruženju odnosno kvalifikovanost sukladno članu 2. ovog pravilnika te da druga primjerena djelovanja u ime Udruženja a za račun tih osoba sukladno u kontekstu kolektivnog ostvarivanja prava tih osoba.

(2) Osoba koja, radi pristupa u redovno članstvu Udruženja, daje podatke, dostavi dokaze, saopšti ili na bilo koji drugi način pruži bilo koju činjenicu bilo koje vrste ili podatak odnosno daje, dostavi ili uzrokuje da se dostavi ili učini dostupnim Udruženju bilo koji dokaz bilo koje vrste Udruženju na čemu zasniva zadovoljenje zakonskih i statuarskih uslova odnosno kvalifikovanost za pristupanje redovnom članstvu Udruženja, snosi punu materijalnu odnosno imovinsku, krivičnu, prekršajnu, građansku, disciplinsku, moralnu i svaku drugu odgovornost za potpunost, ispravnost, tačnost i integritet svake pojedine dostavljene činjenice kao i svih činjenica kao cjeline, za svaki individualni podatak kao i za sve podatke kao cjelinu, za svaki individualni dokaz kao i sve dokaze kao cjelinu koju je ta osoba ili bilo koja druga osoba u ime i za račun osobe koja želi pristupiti redovnom članstvu Udruženja ili koja jeste pristupila redovnom članstvu Udruženja dostavila Udruženju.

(3) Udruženje ima obavezu da čuva kao poslovnu tajnu sve lične i privatne činjenice, podatke i dokaze koje dostavi osoba koja želi pristupiti u članstvo u Udruženju te ima obavezu da postupa u skladu sa svim relevantnim pravnim pravilima povodom djelovanja povodom privatnih podataka i zaštite istih u BiH. Udruženje će na isti način da postupi sa svim podacima za koje osoba koja pristupa članstvu naznači Udruženju da želi da se tretiraju kao lični odnosno privatni sukladno primjenjivim relevantnim pozitivnim pravnim pravilima.

(4) Udruženje ima obavezu da arhivira i čuva dostavljene činjenice, podatke i dokaze sukladno relevantnim primjenjivim pravilima u BiH ali i pravilima Evropske unije i država sa čijim kolektivnim udruženjima Udruženje ima recipročne ugovore i gdje djelovanje povodom podataka redovnog člana je uređeno tim pravilima. Udruženje će obratiti posebnu pažnju na zaštitu i primjereno djelovanje povodom onih podataka o članovima koji se smatraju ličnim a posebno koje se smatraju ili za koje je naznačeno da se trebaju tretirati privatnim. Dužnost je djelatnika Stručne službe Udruženja da se pridržava međunarodnih i općeprihvaćenih pravila, standarda i principa koji se primjenjuju u praksi kolektivnog ostvarivanja prava povodom pristupa, zaštite, arhiviranja i djelovanja povodom ličnih i privatnih podataka.

(5) Udruženje će voditi evidenciju osoba koje su izrazile želju za pristupanje u redovno članstvo Udruženja ali, iz bilo kog razloga, nisu pristupile u redovno članstvo Udruženja.

(6) Udruženje će jednako tretirati i činjenice, podatke i dokaze koje dostavi osoba koja, iz bilo kog razloga, ne završi uspješno pristupanje redovnom članstvu u Udruženju.

(7) Predstavlja povredu članske discipline člana Udruženja i obaveza člana organa Udruženja ukoliko član koji djeluje u organima Udruženja ili bilo koji drugi član koji po bilo kojoj osnovi i na bilo koji način, pa i protupravno, ima ili dobije pristup ličnim i/ili privatnim činjenicama, podacima i dokazima koji su dostavljeni Udruženju u postupku pristupanja redovnom članstvu Udruženja ili vezani za redovno članstvo člana Udruženja, obznani, podjeli ili na bilo koji drugi način bez valjane pravne osnove i/ili dozvole kada je takva osnova i/ili dozvola potrebna sukladno relevantnim pravnim pravilima a posebno bez naloga ovlaštene osobe, distribuira, učini dostupnim ili na bilo koji način djeluje sa namjerom ili rezultatom da bilo koja neovlaštena osoba dobije priliku da sazna, izvrši uvid ili na bilo koji drugi način iskoristi, koristi ili upotrijebi te činjenice, podatke ili dokaze. Član u pitanju snosi punu pravnu, disciplinsku i svaku drugu odgovornost kako Udruženju tako i osobi povodom čijih podataka, dokumenata i dokaza je na ovaj neprimjeren način djelovala.

(8) Predstavlja povredu iz radnog odnosa i narušavanje radne discipline ukoliko službenik ili drugi zaposlenik odnosno osoba koja je na bilo koji način pravno povezana sa Stručnom službom Udruženja koji po bilo kojoj osnovi i na bilo koji način, pa i protupravno, ima ili dobije pristup ličnim i/ili privatnim činjenicama, podacima i dokazima koji su dostavljeni Udruženju u postupku pristupanja redovnom članstvu Udruženja ili vezani za redovno članstvo člana Udruženja, obznani, podjeli ili na bilo koji drugi način bez valjane pravne osnove i/ili dozvole kada je takva osnova i/ili dozvola potrebna sukladno relevantnim pravnim pravilima a posebno bez naloga ovlaštene osobe, distribuira, učini dostupnim ili na bilo koji način djeluje sa namjerom ili rezultatom da bilo koja neovlaštena osoba dobije priliku da sazna, izvrši uvid ili na bilo koji drugi način iskoristi, koristi ili upotrijebi te činjenice, podatke ili dokaze. Zaposlenik u pitanju snosi punu pravnu, disciplinsku i svaku drugu odgovornost kako Udruženju tako i osobi povodom čijih podataka, dokumenata i dokaza da je na ovaj neprimjeren način djelovala.

Član 7.

(1) Fizička osoba koje želi pristupiti redovnom članstvu Udruženja ima pravo i obavezu da tačno, potpuno i ispravno popuni obrazac o osnovnim podacima o toj fizičkoj osobi.

(2) Tačno, potpuno i ispravno popunjen i od strane djelatnika Stručne službe Udruženja prihvaćen obrazac iz prvog stava ovog člana predstavlja uslov za zaključenje ugovora o kolektivnom ostvarivanju autorskih prava

- autora muzičkih djela između Udruženja i osobe koja želi pristupiti redovnom članstvu Udruženja na koju se taj obrazac odnosi, te shodno, predstavlja uslov za pristupanje redovnom članstvu Udruženja.
- (3) Izgled i sadržaj obrazca iz prvog stava ovog člana će odlukom odrediti Generalni direktor Stručne službe Udruženja.
 - (4) Osoba koja želi pristupiti redovnom članstvu Udruženja snosi punu odgovornost za tačnost i potpunost popunjenog obrazca koji se odnosi na svoje podatke iz prvog stava ovog člana. Ta osoba analogno odgovara i u slučaju da obrazac popunjava i Udruženju podnosi i druga osoba po ovlaštenju osobe koja se želi pridružiti redovnom članstvu Udruženja.
 - (5) Djelatnik Stručne službe Udruženja koji ima obavezu djelovanja povodom postupka pristupa redovnih članova Udruženju ima obavezu prije prihvatanja obrazca da pregleda obrazac iz prvog stava ovog člana u trenutku njegovog podnošenja i da skrene pažnju na sve nedostatke koje primjeti povodom popunjavanja istog kao i podataka koji su uvršteni u isti općenito. Ukoliko podnositelj obrazca ne napravi izmjene i dopune obrazca koje naloži djelatnik Stručne službe Udruženja, djelatnik Stručne službe Udruženja može odbiti da prihvati obrazac sve dok podnositelj ne napravi sve potrebne izmjene i dopune.
 - (6) Od trenutka prihvatanja obrazca djelatnik Stručne službe Udruženja snosi solidarnu odgovornost za popunjenost obrazca iz prvog stava ovog člana koju je u trenutku podnošenja obrazca morao primjetiti.
 - (7) Pravna osoba koja želi pristupiti redovnom članstvu Udruženja ima pravo i obavezu da tačno, potpuno i ispravno popuni obrazac za pravnu osobu o osnovnim podacima o toj pravnoj osobi.
 - (8) Izgled i sadržaj obrazca za pravnu osobu će odlukom odrediti Generalni direktor Stručne službe Udruženja.
 - (9) Odgovornost za tačnosti i potpunost obrazca pravne osobe koja želi pristupiti redovnom članstvu Udruženja snosi solidarno ta pravna osoba i odgovorna fizička osoba u pravnoj osobi, kao i osoba koja je popunila obrazac po ovlaštenju od pravne osobe odnosno odgovorne fizičke osobe i koja je u ime i za račun pravne osobe Udruženju podnijela obrazac iz prvog stava ovog člana.
 - (10) Na ostale aspekte obrazca i procesuiranja obrazca pravne osobe se analogno primjenjuju odredbe o obrazcu fizičke osobe.
 - (11) Odlukom će Generalni direktor Stručne službe Udruženja urediti da li će i u kom obliku se omogućiti elektronsko popunjavanje i podnošenje bilo kog obrazca iz ovog člana.
 - (12) Udruženje čuva, prikuplja, obrađuje, koristi, objavljuje i na drugi način djeluje povodom nekih od podataka koje će putem obrazca osoba koja želi pristupiti redovnom članstvu Udruženja dostaviti Udruženju a da bi zadovoljili zakonske obaveze i postupali u skladu sa dobrim poslovnim i drugim praksama te radi drugih konsideracija. Na osnovu ove odredbe, sa kojom svaka osoba koja želi postati redovnim članom Udruženja treba biti upoznata, osoba u pitanju daje dozvolu Udruženju da djeluje prema takvim podacima u onim slučajevima kada je davanje takve dozvole potrebno sukladno relevantnim pravnim odredbama.

Član 8.

- (1) Fizička osoba koja želi pristupiti redovnom članstvu Udruženja mora dostaviti pravno valjan i provjeriv dokaz da je ili autor autorskog muzičkog djela i/ili da je koautor autorskog muzičkog djela i/ili da je nosilac autorskog prava povodom autorskog muzičkog djela.
- (2) Pravne osobe koje žele pristupiti redovnom članstvu Udruženja, koje sukladno članu 9. ZAISP-a ne mogu biti autorom i/ili koautorom a jedino je moguće da budu nosioci autorskog prava povodom autorskog muzičkog djela pa stoga jedino mogu i dostaviti dokaz da su nosiocem autorskog prava povodom autorskog muzičkog djela. Neće biti prihvaćeni dokazi da je pravna osoba autor i/ili koautor autorskog muzičkog djela.
- (3) Autorstvo autorskog muzičkog djela i/ili koautorstvo autorskog muzičkog djela i/ili status nosioca autorskog prava povodom autorskog muzičkog djela se dokazuje prijavljivanjem autorskog muzičkog djela Udruženju sukladno postupku definisanom zakonskim i statutarnim odredbama i relevantnom pravilniku koji uređuje prijave autorskih muzičkih djela Udruženju.
- (4) Osoba koja želi pristupiti redovnom članstvu Udruženja mora imati uredno i uspješno prijavljeno najmanje jedno autorsko muzičko djelo a preferentno sva autorska muzička djela povodom kojih je ta osoba ili autor i/ili koautor i/ili nosilac autorskih prava.
- (5) Prijavljenost najmanje jednog autorskog muzičkog djela povodom kojeg je osoba koja želi pristupiti redovnom članstvu Udruženja ili autor i/ili koautor i/ili nosilac autorskog prava te dokazivanje statusa autora i/ili koautora i/ili nosioca autorskog prava povodom najmanje jednog autorskog muzičkog djela na ovaj način je uslovom za zaključenje ugovora o kolektivnom ostvarivanju autorskih prava autora autorskih muzičkih djela između Udruženja i osobe koja želi pristupiti redovnom članstvu Udruženja na toj pravno relevantnoj činjenici te shodno je uslovom za pristupanje redovnom članstvu Udruženja za tu osobu.

(6) Osoba ne mora da dostavi potvrdu o prijavljenosti autorskog muzičkog djela Udruženju jer je to evidencija koju vodi Udruženje. Ukoliko je autorsko muzičko djelo prethodno prijavljeno Udruženju osoba koja želi pristupiti redovnom članstvu Udruženja mora naznačiti tu činjenicu te pružiti sve potrebne podatke da identifikuje prijavu autorskog muzičkog djela u pitanju ovlaštenom djelatniku Stručne službe Udruženja.

(7) Ovlašteni službenik Stručne službe Udruženja će izvršiti uvid u relevantnu evidenciju Udruženja kojim će utvrditi da li osoba u pitanju ima prijavljeno najmanje jedno autorsko muzičko djelo kao autor i/ili koautor i/ili nosilac autorskog prava te ukoliko ta osoba nema prijavljeno niti jedno autorsko muzičko djelo povodom kojeg je ili autor i/ili koautor i/ili nosilac autorskog prava će uputiti tu osobu da prijavi autorsko muzičko djelo Udruženju povodom kojeg je ili autor i/ili koautor i/ili nosilac autorskog prava. Ovlašteni službenik Stručne službe će obustaviti konkretni postupak pristupa te osobe redovnom članstvu Udruženja sve dok konkretna osoba koja želi pristupiti redovnom članstvu Udruženja uspješno ne završi postupak prijave autorskog muzičkog djela povodom kojeg je ili autor i/ili koautor i/ili nosilac autorskog prava prema pravilima relevantnog pravilnika.

(8) Ovlašteni službenik Stručne službe će sugerirati i naglasiti bitnost za svaku osobu da prijave sva autorska muzička djela povodom kojih je osoba u pitanju ili autor i/ili koautor i/ili nosilac autorskog prava.

Član 9.

(1) Fizička osoba koje je povodom autorskog muzičkog djela ili autor i/ili koautor i/ili nosilac autorskog prava i koje je državljanin Bosne i Hercegovine a želi pristupiti redovnom članstvu Udruženja ima pravo i obavezu da Udruženju dostavi dokaz o svom državljanstvu Bosne i Hercegovine.

(2) Državljanstvo, za potrebe ovog pravilnika, se dokazuje Udruženju putem pravno valjane i uredne potvrde o državljanstvu koju je izdao nadležni državni organ u pravom definisanoj proceduri a kojem dokumentu nije prošao rok važenja, gdje se dokument u pitanju dostavlja u originalu, ovjerenom kopiji ili kopiji za koju je ovlašteni službenik utvrdio, te posvjedočio istovrsnost sa originalom.

(3) Državljanstvo, za potrebe ovog pravilnika, se može dokazati Udruženju i putem valjane te važeće lične karte izdate od strane nadležnog državnog organa kao i putem valjanog i važećeg pasoša/putovnice izdatog od strane nadležnog državnog organa. U slučaju da se državljanstvo dokazuje ovim sredstvom Udruženje ima obavezu da napravi fotokopiju ili na drugi način da obezbijedi analogan ili digitalan dokaz postojanja i sadržaja dokumenta u pitanju.

(4) Državljanstvo, za potrebe ovog pravilnika, se može dokazati Udruženju i bilo kojim drugim dokumentom ili izvorom za koji relevantna pravna pravila primjenjiva u BiH određuju da može poslužiti za dokazivanje državljanstva. U slučaju neizvjesnosti bilo koje vrste da li se nekim dokumentom ili izvorom može dokazati državljanstvo Udruženju, Udruženje će tražiti mišljenje nadležnog državnog organa i postupiti po istom. Ukoliko se državljanstvo dokazuje na ovaj način Udruženje ima obavezu da sačuva primjerak dokumenta ili izvora na bilo koji svrsishodan način koji upućuje na i posvjedočuje činjenicu državljanstva BiH osobe u pitanju.

(5) Jednom kada se dostavi dokaz o državljanstvu osoba na koju se taj dokaz odnosi a dok je redovnim članom Udruženja, ima obavezu da dostavi dokaz o svakoj izmjeni i promjeni u statusu državljanina BiH osobe u pitanju.

(6) Dostavljanje dokaza o državljanstvu je uslovom za zaključenje ugovora o kolektivnom ostvarivanju autorskih prava autora autorskih muzičkih djela između Udruženja i osobe koja želi pristupiti redovnom članstvu Udruženja na toj pravno relevantnoj činjenici te shodno je uslovom za pristupanje redovnom članstvu Udruženja za tu osobu.

Član 10.

(1) Fizička osoba koja je povodom autorskog muzičkog djela ili autor i/ili koautor i/ili nosilac autorskog prava koja nije državljanin Bosne i Hercegovine ali kojoj osobi je nadležni državni organ BiH na pravno valjan način odobrio stalni boravak u Bosni i Hercegovini a želi pristupiti redovnom članstvu Udruženja ima pravo i obavezu da Udruženju dostavi dokaz o tome da jeste i na koji način nadležan državni organ BiH na pravno valjan način odobrio stalni boravak toj osobi u Bosni i Hercegovini.

(2) Činjenica da je osobi nadležni državni organ odobrio stalni boravak u Bosni i Hercegovini, za potrebe ovog pravilnika, se dokazuje dostavljanjem originala ili ovjerene kopije formalnog akta kojim je nadležni državni organ u Bosni i Hercegovini na pravno valjan način i poštujući relevantnu proceduru odobrio stalni boravak u Bosni i Hercegovini.

(3) Činjenica da je osobi nadležni državni organ odobrio stalni boravak u Bosni i Hercegovini, za potrebe ovog pravilnika, se može dokazati i dostavljanjem legitimacije, potvrde, ličnog dokumenta ili druge isprave ili izvora izdatog od strane nadležnog organa Bosne i Hercegovine iz kojeg se prema relevantnim pozitivnim pravnim

pravilima može utvrditi da je nadležni državni organ odobrio stalni boravak u Bosni i Hercegovini osobi u pitanju.

(4) Činjenica da je osobi nadležni državni organ odobrio stalni boravak u Bosni i Hercegovini, za potrebe ovog pravilnika, se može dokazati i bilo kojim drugim dokumentom ili izvorom koji može poslužiti da se putem istog dokaže ova relevantna činjenica. U slučaju neizvjesnosti bilo koje vrste po bilo kom pitanju iz ovog člana ovog pravilnika ovlašteni djelatnik Stručne službe Udruženja će konsultovati nadležni državni organ i postupiti prema dobivenim instrukcijama.

(5) Jednom kada se dostavi dokaz o činjenici da je osobi nadležni državni organ BiH na pravno valjan način odobrio stalni boravak u Bosni i Hercegovini osoba na koju se taj dokaz odnosi a dok je redovnim članom Udruženja na toj činjenici, ima obavezu da dostavi obavještenje i dokaz o svakoj izmjeni i promjeni ove ili činjenice koja se odnosi na ovu činjenicu.

(6) Dostavljanje dokaza o činjenici da je osobi nadležni državni organ odobrio stalni boravak u Bosni i Hercegovini je uslovom za zaključenje ugovora o kolektivnom ostvarivanju autorskih prava autora autorskih muzičkih djela između Udruženja i osobe koja želi pristupiti redovnom članstvu Udruženja na toj pravno relevantnoj činjenici te shodno je uslovom za pristupanje redovnom članstvu Udruženja za tu osobu.

Član 11.

(1) Pravna osoba koja je nosiocem autorskog prava povodom autorskog muzičkog djela i koja je registrovana u Bosni i Hercegovini a koja želi pristupiti redovnom članstvu Udruženja ima pravo i obavezu da dokaže da je registrovana u Bosni i Hercegovini i kumulativno da dokaže da je nosiocem barem jednog individualnog subjektivnog prenosivog autorskog prava povodom barem jednog autorskog muzičkog djela.

(2) Činjenica da je pravna osoba registrovana u Bosni i Hercegovini se dokazuje originalom ili ovjerenom kopijom potvrde i/ili izvoda iz registra za tu vrstu pravne osobe pri relevantnom nadležnom državnim organom, dostavljanjem svakog dokumenta za koji relevantne pravne norme uređuju da predstavljaju osnovu za utvrđenje registrovanosti pravne osobe u Bosni i Hercegovini te na svaki drugi način na osnovu kojeg se sa dovoljnom sigurnosti može utvrditi da je pravna osoba u pitanju, registrovana u Bosni i Hercegovini.

(3) Status nosioca barem jednog individualnog subjektivnog prenosivog autorskog prava povodom barem jednog autorskog muzičkog djela pravne osobe se dokazuje prijavljivanjem autorskog muzičkog djela Udruženju sukladno postupku definisanom zakonskim i statutarnim odredbama i relevantnom pravilniku koji uređuje prijave autorskih muzičkih djela Udruženju.

(4) Ako je autorsko muzičko djelo povodom kojeg je pravna osoba nosilac prava već prijavljeno pravna osoba će dostaviti ovlaštenom službeniku Stručne službe dovoljno podataka na osnovu kojih može pronaći registraciju te dostaviti dokaz i pravnu osnovu na osnovu koje je pravna osoba stekla status nosioca autorskog prava povodom konkretnog autorskog muzičkog djela te će ovlašteni djelatnik Stručne službe uputiti pravnu osobu da prijavi svoj status nosioca prava povodom tog autorskog muzičkog djela sukladno relevantnim pravnim i odredbama relevantnog pravilnika koji uređuje postupak prijave autorskih muzičkih djela Udruženju.

(5) Ako autorsko muzičko djelo povodom kojeg je pravna osoba nosilac autorskog prava nije prijavljeno Udruženju, ovlašteni djelatnik Stručne službe Udruženja će uputiti pravnu osobu da prijavi autorsko muzičko djelo u pitanju sukladno relevantnim pravnim pravilima i relevantnim pravilnikom Udruženja te obustaviti postupak pristupanja redovnom članstvu Udruženja za tu pravnu osobu do zaključenja postupka uspješne prijave tog autorskog muzičkog djela Udruženju.

(7) Ukoliko pravna osoba pristupi redovnom članstvu Udruženja na osnovu statusa nosioca autorskog prava povodom konkretnog autorskog muzičkog djela te ukoliko dođe do promjene statusa ili podataka u pitanju tokom trajanja članstva te pravne osobe, pravna osoba u pitanju ima pravo i obavezu da o činjenici prestanka ili promjene statusa nosioca autorskog prava povodom barem jednog autorskog muzičkog djela bez odlaganja obavjesti Stručnu službu Udruženja.

(8) Dostavljanje kumulativnih dokaza o činjenici da je konkretna pravna osoba i nosilac autorskog prava povodom autorskog muzičkog djela i da je registrovana u Bosni i Hercegovini je uslovom za zaključenje ugovora o kolektivnom ostvarivanju autorskih prava autora autorskih muzičkih djela između Udruženja i te pravne osobe koja želi pristupiti redovnom članstvu Udruženja na toj pravno relevantnoj činjenici te shodno je uslovom za pristupanje redovnom članstvu Udruženja za tu pravnu osobu.

Član 12.

(1) Osoba koja želi da pristupi redovnom članstvu Udruženja treba svoju volju za pristupanje redovnom članstvu Udruženja usmeno saopštiti Stručnoj službi Udruženja dolaskom u sjedište ili bilo koju ispostavu Udruženja, a

pisano putem preporučene pošte sa povratnom adresom ili korištenjem naznačenih adresa za elektronsku komunikaciju.

- (2) Dužnost svake osobe, koja djeluje u ime i za račun Udruženja je da u slučaju ako primi obavještenje iz prvog stava ovog člana uputi osobu u pitanju na djelatnika/ke Stručne službe Udruženja ovlaštenog i zaduženog na provođenje postupka pristupanja redovnim članovima Udruženja.
- (3) Ovlašteni djelatnik Stručne službe Udruženja, po saznanju na bilo koji način o saopštenju iz prvog stava ovog člana, ima pravo i obavezu da upozna osobu u pitanju sa uslovima za članstvo, sa obrazcem/cima i dokazima koje ta osoba ima pravo i obavezu da pruži i dostavi Udruženju, sa obavezom prijavljivanja minimalno jednog autorskog muzičkog djela kojem je ta osoba ili autor i/ili koautor i/ili nosilac autorskog prava ako do sada nije prijavljeno niti jedno autorsko muzičko djelo kojem je ta osoba ili autor i/ili koautor i/ili nosilac autorskog prava, sa poželjnošću prijavljivanja svih autorskih muzičkih djela kojima je ta osoba ili autor i/ili koautor i/ili nosilac autorskog prava, sa sadržajem ugovora o kolektivnom ostvarivanju autorskih prava povodom autorskih muzičkih djela koji se ima zaključiti između osobe i Udruženja i koji predstavlja pravnu osnovu pristupa redovnom članstvu Udruženja, sa posljedicama zaključenja tog ugovora te općenito upoznati osobu sa postupkom pristupa redovnim članovima Udruženja i odredbama ovog pravilnika kao i drugim relevantnim primjenjivim pravilima i pitanjima povodom postupka pristupa redovnim članovima Udruženja.
- (4) Kada osoba koja želi pristupiti redovnom članstvu Udruženja dostavi bilo koji dokaz ili obrazac ili dokument u postupku pristupanja redovnom članstvu Udruženja pravo i obaveza je ovlaštenog djelatnika Stručne službe Udruženja da provjeri formalnu i materijalnu urednost podneska, dokumenta ili drugog izvora u pitanju naspram relevantnih pravila Udruženja u potpunosti a povodom drugih relevantnih pozitivnih pravnih pravila koliko je to razumno moguće unutar granica ovlaštenja i nadležnosti Udruženja, ako iste postoje. Djelatnik Stručne službe će posebno obratiti pažnju da spriječi podnošenje i prihvatanje dokumenata za koje zna ili iz okolnosti može zaključiti da su netačni, lažni, falsifikovani, da predstavljaju zloupotrebu ili drugo neprimjereno djelovanje.
- (5) U slučaju bilo koje neizvjesnosti ili sumnje povodom bilo kog dostavljenog podneska, povodom bilo koje dostavljene pojedine činjenice, dokaza i drugog, ovlašteni djelatnik Stručne službe Udruženja ima pravo i obavezu da konsultuje primjeren organ Udruženja uključujući i radna tijela Udruženja, članove Udruženja i druge primjerene osobe te isti djelatnik može tražiti stručno mišljenje od kompetentnih osoba ili od nadležnog državnog organa ili drugog tijela.
- (6) Kada osoba koja želi pristupiti redovnom članstvu Udruženja dostavi sve potrebne činjenice, obrasce, dokaze te kada djelatnik Stručne službe Udruženja prihvati uredno i potpuno popunjen obrazac odnosno kada se zadovolje obaveze osobe u pitanju iz ovog pravilnika i drugih relevantnih primjenjivih pravnih pravila povodom djelovanja i dostavljanja dokaza/dokumenata/podataka iz ovog pravilnika povodom postupka pristupa redovnim članovima Udruženja, ovlašteni djelatnik Stručne službe Udruženja će objediniti sve podneske, dokaze, dokumente, dostavljene činjenice i druge podatke u jedan spis i isti proslijediti dopisom Radnom tijelu za reviziju članstva Udruženja na razmatranje i dalje postupanje.
- (7) Radno tijelo za reviziju članstva Udruženja će razmotriti materijal koji je na način iz prethodnog stava dostavljen Radnom tijelu na sljedećoj redovnoj sjednici. Radno tijelo može tražiti objašnjenja od Stručne službe i konkretne osobe koja želi pristupiti redovnom članstvu Udruženja, te od tih osoba dodatne dokaze i izmjene i dopune ukoliko smatra da postoje nedostaci sa dokazima, ponescima, dokumentima ili drugim materijalom dostavljenom Stručnoj službi Udruženja ili materialom koji je prikupljen od strane Stručne službe Udruženja po bilo kojoj osnovi a vezani za postupak pristupanja konkretne osobe redovnom članstvu Udruženja.
- (8) Radno tijelo za reviziju članstva će pisanim dopisom dati svoje obrazloženo mišljenje i preporuku da li konkretna osoba zadovoljava sve zakonske i statutarne uslove za pristupanje u redovno članstvo u Udruženju odnosno da li je kvalifikovana sukladno članu 2. ovog pravilnika za redovno članstvo u Udruženju.
- (9) Ukoliko je mišljenje Radnog tijela za reviziju članstva iz prethodnog stava negativno o toj činjenici će ovlašteni djelatnik Stručne službe obavijestiti osobu koja želi pristupiti redovnom članstvu Udruženja i obustaviti postupak pristupanja redovnom članstvu Udruženja.
- (10) Osoba koja želi pristupiti redovnom članstvu Udruženja ima pravo žalbe na odluku iz prethodnog stava Upravnom odboru Udruženja u roku od 7 dana od primanja obavijesti.
- (11) U slučaju pozitivnog mišljenja Radnog tijela, ovlašteni djelatnik Stručne službe Udruženja će spis zajedno sa mišljenjem Radnog tijela za reviziju članstva proslijediti osobi koja je Statutom Udruženja ovlaštena da potpisuje ugovore za kolektivno ostvarivanje autorskih prava povodom autorskih muzičkih djela na potpis.
- (12) Osoba koja je Statutom Udruženja ovlaštena da potpisuje ugovore za kolektivno ostvarivanje autorskih prava povodom autorskih muzičkih djela ima pravo i obavezu da razmotri sve dostavljene materijale te može

odbiti da potpiše ugovor u pitanju sa konkretnom osobom. U tom slučaju osoba koja je Statutom Udruženja ovlaštena da potpisuje ugovor ove vrste mora pisano obrazložiti svoju odluku.

(13) Odluku iz prethodnog stava će ovlašteni djelatnik Stručne službe Udruženja dostaviti osobi koja želi da pristupi redovnom članstvu Udruženja na koju se ta odluka odnosi koja ima pravo žalbe na istu Upravnom odboru u roku od 7 dana od primanja obavijesti.

(14) Ukoliko osoba koja želi pristupiti redovnom članstvu Udruženja bude nezadovoljna odlukama Upravnog odbora iz ovog člana povodom pristupanja redovnom članstvu Udruženja može izjaviti žalbu u roku od 30 dana Skupštini Udruženja na razmatranje na sljedećoj redovno zakazanoj sjednici. Odluka Skupštine po ovom pitanju će se smatrati konačnom ako nije drugačije, drugim izvorom određeno.

(15) Osoba za koju se konačno utvrdilo da nije zakonski ili statutarno, odnosno kvalifikovana sukladno članu 2. ovog pravilnika za redovno članstvo u Udruženju može kada stekne potrebnu kvalifikaciju te ponovo pokrene postupak za pristupanje redovnom članstvu Udruženja bez ograničenja.

(16) Ovlašteni službenik Stručne službe se zadužuje da poduzme razumne mjere a suzbije zloupotrebu i nesavjesno korištenje prava iz prethodnog stava ovog člana.

Član 13.

Ovaj pravilnik stupa na snagu danom donošenja a početi će se primjenjivati mjesec dana nakon stupanja na snagu.

Broj: P-02/20
Sarajevo, 18.06.2020. godine

Predsjednik Skupštine AMUS-a

Davor Sucić

